

■ RUMANTSCHS EN LA BASSA

Chant rumantsch a Berna

(anr/ld) «Nus chantain rumantsch,...
wir singen romanisch». Cun quest
motto sa preschenta il Chor maschadà
grischun da Berna dumengia, ils 14 da
settember allas 10.00 a Köniz sper Ber-
na. L'occurrentza organisada da l'«Uniun
dals chors Berna e contuorn» ha lieu en
l'aula da scola (OZK), ella è publica. Sut
la direcziun da *Margrit Baumli* chanta il
Chor maschadà grischun, cun sustegn
dal Chor viril da Berna, las duas chan-
zuns «Adieu a l'Engiadina» e «Mia mum-
ma». Finamira da questa participaziun è

da marcar preschientscha dal chant ru-
mantsch a Berna e conturn e d'animar
Rumantschas e Rumantschs da suste-
gnair il chor.

Dapi passa 65 onns exista a Berna il
Chor maschadà grischun. El tgira il
chant popular tradiziunal en tut ils
idioms. Ils ultims onns ha embellì il
Chor maschadà grischun bleras festas
grischunas a Berna, organisadas a cha-
schun d'elecziuns da Grischunas e Gri-
schuns en ils pli auts posts politics da la
confederaziun. La preschientscha dal

chant rumantsch en la chapitala svizra è
da gronda muntada politica, vegnan de-
cisiuns davart il rumantsch gea era pren-
didas en il parlament federal, en il center
politic a Berna.

L'existenza dal chor è oz periclitada
sche quai na reussescha betg da chattar
novas forzas. Il Chor maschadà grischun
fa sias provas mintgamai duas mesemnas
al mais en il restaurant Bären ad Oster-
mundigen. Faschei ina giada ina visita.

Infurmaziuns dattan: Lucas Deplazes, 031 981
11 73 u la presidenta, Rita Holzer, 031 911 32 04.